

湛然居士集

柳田文庫

文庫11

D 119

3

三



文庫 11
D 119
3

010190552778

附李若農侍郎湛然居士文集卷七跋

湛然集卷七過金山和人韻三首第一高牢號次流秋

毬三清晴明案邱處機西遊記金山詩三絕第一清晴

明次流秋毬三高牢號然則和人者即和邱處機也西

遊記絕不及耶律晉卿而此集亦絕不聲敘長春一語

殆以晉卿溺釋長春學道本不同類始雖相和後乃相

惡而絕交歟觀晉卿歸依萬松老人而頗毀老氏故知

其異趣也偶拈出之光緒丁亥六月李文田

晉卿西遊錄序辨邪論序等篇皆專為攻擊邱處機而

作者也六月十日又識



湛然居士文集卷八目次
醉義歌
題恆岳飛來石
為慶壽寺作萬僧疏
太原開化寺革律為禪仍命子為功德主因作疏
為石壁寺請信公菴主開堂疏
王山圓明禪院請子為功德主因作疏
萬卦山天寧萬壽禪寺命子為功德主因作疏
請某公菴主住竹林疏
請湛公禪師住紅螺山寺疏

湛然居士文集卷八目次

醉義歌

題恆岳飛來石

為慶壽寺作萬僧疏

太原開化寺革律為禪仍命子為功德主因作疏

為石壁寺請信公菴主開堂疏

王山圓明禪院請子為功德主因作疏

萬卦山天寧萬壽禪寺命子為功德主因作疏

請某公菴主住竹林疏

請湛公禪師住紅螺山寺疏



請容公和尚住竹林疏

請智公尼禪開堂疏

代劉帥請智公尼禪住報先寺

請某菴主開堂疏

爲慶壽寺化萬僧疏

請亨公菴主開堂疏

三學寺改名圓明請予爲功德主因作疏

平陽淨名院革律爲禪請潤公住持疏

太原五臺寺請予爲功德主因作疏

請定公菴主出世疏

大龍山永寧石壁禪寺請忘憂居士爲功德主代
爲之疏

代忘憂居士請琳公住持壽寧禪寺疏

爲大覺開堂疏 三道

司天判官張居中六壬祛惑鈴序

苗彥實琴譜序

答楊行省書

進征西庚午元曆表

西遊錄序

辨邪論序

寄趙元帥書

萬松老人評唱天童覺和尚頌古從容菴錄序
評唱天童拈古請益後錄序

燕京崇壽禪院故圓通大師朗公碑銘

貧樂菴記

自贊二首

燕京大覺禪寺創建經藏記

湛然居士文集卷八目次終

湛然居士文集卷八

元 耶律楚材 晉卿 撰

醉義歌

遼朝寺公大師者一時豪俊也。賢而能文。尤長於歌詩。其旨趣高遠。不類世間語。可與蘇黃並驅爭先耳。有醉義歌。乃寺公之絕唱也。昔先人文獻公嘗譯之。先人早逝。予恨不得一見。及大朝之西征也。遇西遼前郡王李世昌於西域。予學遼字於李公。期歲頗習。不揆狂斐。乃譯是歌。庶幾形容其萬一云。

曉來雨霽日蒼涼。枕幃搖曳西風香。困眠未足正展轉。
兒童來報今重陽。吟兒蒼蒼渾塞色。容懷袞袞皆吾鄉。
飲衾嘿坐思往事。天涯三載空悲傷。正是幽人歎幽獨。
東鄰攜酒來茅屋。憐予病竄伶仃愁。自言新釀秋泉麴。
凌晨未盥三兩卮。旋酌連斟折蘭菊。我本清癯酒戶低。
羈懷開拓何其速。愁腸解結千萬重。高談幾笑吟秋風。
遙望無何風色好。飄飄漸遠塵寰中。淵明笑問斥逐事。
謫仙遙指華胥宮。華胥咫尺尚未及。人間萬事紛紛空。
一器纔空開一器。宿醒未解人先醉。攜樽挈榼近花前。
折花顧影聊相戲。生平豈無同道徒。海角天涯我遐棄。
我愛南村農丈人。山溪幽隱潛修真。老病猶耽黑甜味。
古風清遠途猶迤。喧囂避遯巖麓僻。幽閑放曠雲泉濱。
旋春新黍爨香餠。一罇濁酒呼予頻。欣然命駕恩恩去。
漠漠霜天行古路。穿村迤邐入中門。老幼倉忙不寧處。
丈人迎立瓦盃寒。老母自供山菓醋。扶攜齊唱雅聲清。
酬酢溫語如甘澍。謂予綠鬢猶可需。謝渠黃髮勤相諭。
隨分窮秋搖酒卮。席邊籬畔花無數。巨觥深筍新詞催。
閑詩古語玄關開。開懷囑酒謝予意。村家不棄來相陪。
適遇今年東鄙阜。黍稷馨香棲畎畝。相邀斗酒不浹旬。
愛君蕭散真良友。我酬一語白丈人。解釋羈愁感黃耇。

請君舉盞無言他。與君卻唱醉義歌。風雲不與世榮別。
石火又異人生何。榮利倘來豈苟得。窮通夙定徒奔波。
梁冀跋扈德何在。仲尼削迹命終多。古來此事原如是。
畢竟思量何怪此。爭如終日且開罇。駕酒乘盃醉鄉裏。
醉中佳趣欲告君。至樂無形難說似。泰山載斲爲深盃。
長河釀酒斟酌之。迷人愁客世無數。呼來拍耳充罰之。
一杯愁思初消鑠。兩盞迷魂成勿藥。爾後連澆三五卮。
千愁萬恨風蓬落。胸中漸得春氣和。腮邊不覺衰顏卻。
四時爲馭馳太虛。二曜爲輪輾空廓。須臾從轡入無何。
自然汝我融真樂。陶陶一任玉山頽。藉地爲茵天作幕。
丈人我語真非真。真真兮此外何足云。丈人我語君聽否。
聽則名利何足有。問君何事徒劬勞。此何卑彼豈高。蜃
樓日出尋變滅。雲峯風起難堅牢。芥納須彌亦閑事。誰
知大海吞鴻毛。夢裏蝴蝶勿云假。莊周覺亦非真者。以
指喻指指成虛。馬喻馬兮馬非馬。天地猶一馬。萬物一
指同。胡爲一指分彼此。胡爲一馬奔西東。人之富貴我
富貴。我之貧困非予窮。三界惟心更無物。世中物我成
融通。君不見千年之松化仙客。節婦登山身變石。木魂
石質既我同。有情於我何瑕隙。自料我身非我身。電光
興廢重相隔。農丈人千頭萬緒幾時休。舉觴酌酒忘形

迹。

題恆岳飛來石

無情居士題恆岳之飛來石有偈云石落黃河北山銜
白日西聰明厭血食悔不值元珪天下稱頌之爲人磨
毀字文漫駁不復識矣有仁上人自恆山來請予復書
是頌欲刊諸舊文之側予應之曰無盡之妙言昭如日
月與天地而齊終豈風霾之能掩哉然不能拒上人之
請勉爲之書己丑清明日湛然居士漆水移刺楚材晉
卿題

爲慶壽寺作萬僧疏

竊以棲身物外已知四大之空寓跡塵中且賴十方之
供矧五常尤尊於博施而六度首重於檀那不求郡國
之英豪誰養林泉之跛挈芒鞋藜杖弗辭千里之勤糲
食蔬羹好助萬僧之化謹疏

太原開化寺革律爲禪仍命予爲功德主因作疏
竊惟昔年開化今日爲禪已蒙智老拈香又請湛然作
主尋行數墨一蠲教化家門運水搬柴便有叢林氣息
謹疏

爲石壁寺請信公菴主開堂疏

竊以達摩昔年莽鹵截鶴續鳧天寧今日顙頊證龜作

龍可憐弄巧成拙不免出醜放乖我信公菴主受洞下
之宗風佩卻波天甯老人道號也之心印參窮行說不到處踏
開偏正未分前既已降尊就卑何愧壓良爲賤逢場作
戲請來鬧裏刺頭借水獻花便好穩處下腳謹疏

王山圓明禪院請予爲功德主因作疏

王山乃靈巖之古刹湛然實萬松之門人既是當家本
非生客春風秋月長聯萬葉之芳晨香夕燈永祝一人
之壽

萬卦山天寧萬壽禪寺命予爲功德主因作疏

惟萬卦之古刹實萬松之舊遊有虛己彥公道號飛書請湛
然作主勉爲提領良慰慙山色水聲永作道人活計
漁歌樵唱備傳衲子家風謹疏

請某公菴主任竹林疏

狐死首邱是難忘於孰處心空及第何猶迷於故園我
某公菴主三頓打不同頭一喝全無入耳喫竹林飯屙
竹林矢嗣竹林法傳竹林禪打甌哄盆莫忘竹林之盛
德披毛帶角好種竹林之道場

請湛公禪師住紅螺山寺疏

祖禰不了慚惶碧眼之老胡兒孫受殃架構紅螺之大
刹既是將錯就錯不免拈空拄空我湛公禪師韶陽遠

孫摩訶嫡子參透三句語擊碎十法門便好住持更休
推讓滔天嶺上只圖同看有毛龜絕頂山頭且要共栽
無影樹謹疏

請容公和尚住竹林疏

慶壽慈悲拽擺犁而耕種竹林瀟灑歎槽廠之空閑已
讓位而逃宜見機而作我容公禪師一條生鐵脊兩片
點鋼唇參透濟下沒把鼻禪說得格外無滋味話呵佛
罵祖且存半面人情揭海掀湖便有一般關捩試問孤
峯頂上何如十字街頭若是本色瞎驢好趁大隊旣號
通方水牯何必芒繩謹疏

請智公尼禪開堂疏

用管仲則安用豎刁則危賢愚政事參萬松則謗參延
洪則讚冷煖人情行窮萬里山川只是一天風月惟智
公禪師本有丈夫志不學老婆禪拈卻花冠弗裝珍御
可駭特牛生特便好出頭勿謂牝雞司晨不敢下背謹
疏

代劉帥請智公尼禪住報先寺

劉公鄰
居報先

洗垢無緣乏遠井之救渴卜鄰有德故近寺而敬僧我
智公禪師先禮報恩後參奉福遠如舊總近似新深澁
鎖打開便請升堂啟戶明燈剔起願希鑿壁偷光謹疏

請某菴主開堂疏

和尚拽碇子不離寺內老鼠拖葫蘆只在倉中某公菴
主先謁報恩再參奉福升回斗轉圜倒厥傾十分利不
圖半文一石禪獨攬八斗莫學淘沙去米打破羅盆且
來量土唱籌熟設敵將謹疏

爲慶壽寺化萬僧疏

隱迹林泉置死生於度外隨身瓶鉢寄口腹於人間欲
隆三寶之風強遣萬僧之化何須異味唯求野菜淡黃
齋不用多般只要山田脫粟鉢謹疏

請亨公菴主開堂疏

亨公菴主久參萬松老人因緣不契再謁王山
大愚和尚不期月罷參予過太原王山寺僧請
予作疏

萬松三頓不回頭王山一鈞便吞鉤大愚不似大愚老
脅下三拳即便休

三學寺改名圓明仍請予爲功德主因作疏

本無男女等相着甚名模強分禪教者流且圖施設粵
三學之巨剎冠四海之名藍今改僧而舍尼遂從禪而
革律邀印公爲粥鉢頭請湛然爲功德主根深蒂固長
聯萬葉之芳地久天長永祝一人之慶謹疏

平陽淨名院革律為禪請潤公禪師住持疏

竊以不居這那院好箇主人本無南北心悉為佛子謹請懷仁潤老來住平陽淨名翡翠簾前請看木人之舞琉璃殿上願聞布鼓之音謹疏

太原五臺寺請予為功德主因作疏

鎮三晉之雄藩有五臺之古刹獻花酌水改律為禪具疏慇懃請予領略謹命休林常祝壽結个好因緣為報文殊莫放光不打遮鼓笛謹疏

請定公菴主出世疏

少林九年打坐祇得半提曹溪五派分開全沒一滴雖

是將無作有也要算假像真我定公菴主洞下立孫

山集亦有蕭夫人參洞下禪之語此是金源僧五臺嫡子解造無米粥能撫沒

絃琴既已炙地薰天須要掀海翻山正逢開化枉開有

力叢林便好出頭莫戀無明鬼窟謹疏

大龍山永寧石壁禪寺請忘憂居士為功德主代

為之疏

惟明月清風取之無禁者况龍巖石壁命予為主人煩我一心護謝他兩手分付千巖好景半文不費買山錢持數紙閑言一狀便充商稅契謹疏

代忘憂居士請琳公禪師住持壽寧禪寺疏

臨汾水之故邑有壽寧之巨藍歷代皈依百年煥顯乞
忘憂爲功德主請琳公爲粥鉢人獨掌不浪鳴單手豈
成拍千年罕遇最難時節因緣一疏連來便是衲僧把
鼻謹疏

爲大覺開堂疏三道

竊以門裏安身早已荆棘漫地巖中宴坐更知過犯彌
天請來借坐升堂便好倩人問話引得轆轤轉也問甚
千遭萬遭快迭爐熬熱時盛搭一箇兩箇
竊以雲門胡餅切忌咬嚼盧陵米價怎敢商量不甘公
案清訛正要作家批判伏惟奧公和尚佩聖安之正印

透韶陽之上關莫守命鬼窟中三彈不動快橫身虎口
裏一勘便招

竊以逢人不出出則便爲人傍觀者哂逢人便出出則
不爲人當局者迷直須一箭透重關不得三心或兩意
自甘入室渾如豹膽熊心不肯陞堂卻是蟲頭鼠尾

司天判官張居中六壬祛惑鈴序

予故人張正之世掌義和之職通經史百家之學尤長
於三式與予參商且二十年矣癸巳之春旣克汴梁渠
入覲於朝形容變盡惟語音存耳乘閒因出書一編曰
六壬祛惑鈴予再四繹之引式明例皆有所據或有隱

奧人所未通者釋以新說蓋採諸經之所長無所矛盾者取其折衷爲一家之書近代未之有也求傳寫者旣眾其同列請刊行以廣其傳余忻然爲引以題其端癸巳中秋日集湛然居士漆水移刺楚材晉卿序

苗彥實琴譜序

古唐棲巖老人苗公秀實其名彥實其字博通古今尤長於易應進士舉兩入御闈而不捷乃拂袖去之公善於琴事爲當今第一嘗遊於京師士大夫閒皆服其高妙泰和中詔天下工於琴者侍郎喬君舉之於朝公待詔於秘書監余幼年刻意於琴初受指於待詔弭大用每得新譜必與棲巖商榷妙意然後彈之朝廷王公大人邀請棲巖者無虛日子不得與渠對指傳聲每以爲恨壬辰之冬王師濟長河破潼關涉京索圍汴梁予奏之朝廷索棲巖於南京得之達范陽而棄世其子蘭絜遺譜而來凡四十餘曲予按之果爲絕聲大率署令衛宗儒之所傳也予今錄之以授後世有知音博雅君子必不以予爲徒說云壬辰仲秋後二日湛然居士漆水移刺楚材晉卿序

答楊行省書

某再拜復書於行省閣下辱書諭及辭位事請聞奏施

行者惟聖代之深仁賞延於世偉閨門之內助貴繫於夫故行省李公雖稽北覲之期頗著南伐之績時不適願天弗假年伏惟閣下族出名家世傳將種無兒女子之態有大丈夫之所爲吏民服心朝廷注意遂授東臺之任冀舒南顧之憂今也抑意陳書引年求退懼折鼎覆餗之患避北雞司晨之譏雖曰謙尊而光曷若隨時之義分茅列土無忘北闕之恩秣馬厲兵可報西門之役今因人回謹復書以聞山川遼闊書簡浮沈比獲瞻依更希調護不宣

進征西庚午元曆表

臣楚材言堯分仲叔春秋謹候於四方舜在璣衡旦暮肅齊於七政所以欽承天象敬授民時典謨實六籍之大經首書其事堯舜爲五帝之盛主先務厥猷皎如日星記之方冊由此言之有國家者律曆之書莫不先也是以三代而下若昔大猷遵而奉之星曆之官代有其人漢唐以來其書大備經元創法無慮百家其氣候之早晏朔望之疾徐二曜之盈衰五星之伏見疏密無定先後不同蓋建立國都而各殊或涉歷歲年之寢遠不得不差也旣差則必當遷就使合天耳唐曆八徙宋曆九更者良以此夫金用大明百年纔經一改此去中原

萬里不啻千程昔密今疏東微西著以地遙而歲久故勢異而時殊庚辰聖駕西征駐蹕尋斯干城是歲五月之望以大明太陰當虧二分食甚子正時在宵中是夜候之未盡初更月已食矣而又二月五月朔微月見於西南校之於曆悉爲先天恭惟皇帝陛下德符乾坤明並日月神武天錫聖智夙資邁唐虞之至仁追羲軒之淳化冀咸仁而底義敬奉天而謹時重勅行臺旁求儒者臣魚蟲細物草芥微人粗習周孔之遺書竊慕羲和之陳迹俎豆之事靡違諸也箕裘之業敢忘於心恨無命世之大才誤忝聖朝之明詔欽承皇旨待罪清臺五載有奇徒曠著龜之任萬分之一聊陳犬馬之勞旣椽曆而覺差竊效顰而改作今演記窮元得積年二千二十七萬五千二百七十歲命庚辰臣愚以爲中元歲在庚午天啟宸衷決志南伐辛未之春天兵南渡不五年而天下略定此天授也非人力所能及也故上元庚午歲天正十一月壬戌朔夜半冬至時加子正日月合璧五星聯珠同會虛宿五度以應我皇帝陛下受命之符也臣又損節氣之分減周天之杪去文終之率治月轉之餘課兩耀之後先調五行之出沒大明所失於是一新驗之於天若合符契又以西域中原地里殊遠創立

里差以增損之雖東西數萬里不復差矣故題其名曰西征庚午元曆以記我聖朝受命之符及西域中原之異也所有曆書隨表上以聞伏乞頒降方臺以備行宮之用臣誠惶誠恐頓首頓首謹言

西遊錄序

古君子南逾大嶺西出陽關壯夫志士不無銷黯予奉詔西行數萬里確乎不動心者無他術焉蓋汪洋法海涵養之效也故述辨邪論以斥糠蟹少荅佛恩戊子乘傳來京里人問異域事慮煩應對遂著西遊錄以見予志其間頗涉三聖人教正邪之辨有譏予之好辨者予應之曰魯語有云必也正名乎又曰思無邪是正邪之辨不可廢也夫楊朱墨翟田駢許行之術孔氏之邪也西域九十六種此方毗盧糠瓢白經香會之徒釋氏之邪也全真大道混元太乙三張左道之術老氏之邪也至於黃白金丹導引服餌之屬是皆方技之異端亦非伯陽之正道疇昔禁斷明著典常第以國家創業崇尙寬仁是致僞妄滋彰未及辨正耳古者嬴秦焚經坑儒唐之韓氏排斥釋老辨之邪也孟子闢楊墨予之黜糠邱辨之正也予將刊行之雖三聖人復生必不易此說矣己丑元日湛然居士漆水移刺楚材晉卿序

辨邪論序

夫聖人設教立化雖權實不同會歸其極莫不得中凡流下士惟務求奇好異以眩耳目噫中庸之爲德也民鮮久矣者良以此夫吾夫子云中人以下不可以語上也老氏亦謂下士聞道大笑之釋典云無爲小乘人而說大乘法三聖之說不謀而合者何哉蓋道者易知易行非掀天拆地翻海移山之詭誕也所以難信難行者舉世好乎異罔執厥中舉世行乎難弗行厥易致使異端邪說亂雅奪朱而人莫能辨悲夫吾儒獨知楊墨爲儒者患辨之不已而不知糠蟹爲佛教之患甚矣不辨猶可而況從而和之或爲碑以記其事或爲賦以護其惡億天下之惡一也何爲患於我而獨能辨之爲患於彼而不辨反且羽翼之使得遂其奸惡豈我夫子忠恕之道哉黨惡佑奸壞風傷教千載之下罪有所歸彼數君子曾不捫心而靜思及此也邪予旅食西域且十年矣中原動靜寂然無聞邇有永安二三友以北京講主所著糠蟹教民十無益論見寄且囑予爲序予再四繹之辨而不恕論而不縵皆以聖教爲據善則善矣然予辭而不序焉予以謂昔訪萬松老師以問糠蟹邪正之道萬松以予酷好屬文因作糠禪賦見示予請廣其傳

萬松不可予強爲序引以行之至今庸民俗士謗歸於萬
松予甚悔之今更爲此序則又將貽謗於講主者也謹
以萬松講主之餘意借儒術以爲比述辨邪論以行世
有謗者予自當之安可使流言飾謗汙玷山林之士哉
後世博雅君子有知我者必不以予爲囁嚅云乙酉日
南至湛然居士漆水移刺楚材晉卿敘於西域瀚海軍
之高昌城

寄趙元帥書

楚材頓首白君瑞元帥足下未審邇來起居何如昔承
京城士大夫數書發揚清德言足下有安天下之志仍
託僕爲先容僕備員翰墨軍國之事非所預議然行道
澤民亦僕之素志也敢不鞭策駑鈍以羽翼先生之萬
一乎僕未達行在而足下車從東旋僕甚怏怏夫端人
取友必端矣京城楚卿子進秀玉輩此數君子皆端人
也楊推足下談不容口故知足下亦端人已然此僕於
足下少有疑焉若夫吾夫子之道治天下老氏之道養
性釋氏之道修心此古今之通議也舍此以往皆異端
耳君之尊儒重道僕尙未見於行事獨觀君所著頭陀
賦序知君輕釋教多矣夫糠蟹釋教之外道也此曹毀
像謗法斥僧滅教棄布施之方杜懺悔之路不救疾苦

敗壞孝風實傷教化之甚者也昔劉紙衣扇偽說以惑
眾迨今百年未嘗聞奇人異士羽翼其說者夫君子之
擇術也不可不慎今君首倡序引黨護左道使後世陷
邪歧墮惡趣皆君啟之矣千古遺恥僕爲君羞之糠蟹
異端也輒與佛教爲比萬松辨賦甘泉勸書反以孟浪
巨蠹之言處之以此行己化人僕不知其可也僕謂足
下輕釋教者良以此也夫於所厚者薄無所不薄君旣
薄釋教則儒道斷可知矣君之於釋教則重糠蟹於儒
道則必歸楊墨矣行路之人皆云足下吝嗇故奉此曹
圖其省費故也昔諸士大夫書來咸謂足下以濟生靈
爲心且吾夫子之道以博施濟眾爲治道之急誠如路
人所說則吾夫子之道亦不可行矣又將安濟生靈乎
又君序頭陀賦云冀請宗師祈冥福以利斯民足下
民之儀表也崇重糠蟹毀斥宗師將使一郡從風漸化
斷知斯民罪惡日增矣又將安以利斯民乎僕謹撰辨
邪論以寄幸披覽之更請涉獵藏教稽考儒書反復參
求其邪正之歧不足分矣僕素知君爲邪教所惑亦未
敢勸諭君不以僕不才轉託諸士大夫萬里相結爲友
故敢以區區忠告易曰方以類聚物以羣分經云士有
諍友故身不離於令名若知而不爭安用友爲若所尙

不同安可爲友或萬一容納鄙論便請杜絕此輩毀頭陀賦板以雪前非如謂僕言未當則請於茲絕交夏暑比平安好更宜以遠業自重區區不宣

萬松老人評唱天童覺和尚頌古從容菴錄序

昔予在京師時禪伯甚多惟聖安

案大金聖安寺在廣寧門內偏西南

公和尚神氣嚴明言詞磊落予獨重之故嘗訪以祖道屢以古昔尊宿語錄中所得者扣之澄公閒有許可者予亦自以爲得及遭憂患以來功名之心束之高閣求祖道愈亟遂再以前事訪諸聖安聖安翻葉不然所見予甚惑焉聖安從容謂予曰昔公位居要地又儒者多

不諦信佛書惟搜摘語錄以資談柄故予不敢苦加鉗鎚耳今揣君之心果爲本分事以問予予豈得猶襲前愆不爲苦口乎予老矣素不通儒不能教子有萬松老人者儒釋兼備宗說精通辨才無礙君可見之予既謁萬松杜絕人迹屏斥家務雖祁寒大暑無日不參焚膏繼晷廢寢忘食者幾三年誤被法恩謬膺子印以湛然居士從源目之其參學之際機鋒罔測變化無窮巍巍然若萬仞峯莫可攀仰滔滔然若萬頃波莫能涯際瞻之在前忽焉在後回視平昔所學皆塊礫耳噫登東山而小魯登太山而小天下者豈虛語哉其未入闔域者

聞是語必謂予志本好異也惟屏山閑閑其相照乎爾
後奉命赴行在扈從西征與師相隔不知其幾千里也
師平昔法語偈頌皆法隆公所收今不復得其彙吾宗
有只童者頌古百篇號爲絕唱予堅請萬松評唱是頌
開發後學前後九書間關七年方蒙見寄予西域伶仃
數載忽受是書如醉而醒如死而甦踴躍歡呼東望稽
顙再四披繹撫卷而歎曰萬松來西域矣其片言隻字
咸有指歸結款出眼高冠古今是爲萬世之模楷非師
範人天權衡造化者孰能與於此哉予與行宮數友旦
夕游詠於是書如登大寶山入華藏海巨珍奇物廣大
悉備左逢而右遇目富而心飫豈可以世間語言形容
其萬一耶予不敢獨擅其美思與天下共之京城惟法
弟從祥者與僕爲忘年交謹致書請刊行於世以貽來
者迺序之曰佛祖諸師埋根千丈機緣百則見世生苗
天童不合抽枝萬松那堪引蔓湛然向枝蔓上更添芒
索穿過尋香逐氣者鼻孔絆倒行玄體妙底腳根向去
若要腳根點地鼻孔撩天卻須向這葛藤穿過始得甲
申中元日漆水移刺楚材晉卿敘於西域阿里馬城

評唱天童拈古請益後錄序

雪竇拈頌佛果評唱之擊節碧巖錄在焉佛果頌古圓

通善國師評唱之覺海軒錄在焉是臨濟雲門互相發揚矣獨洞下宗風未聞舉唱豈曲高和寡耶抑亦待其人耶必有通方明眼判斷尙未晚也昔佛鑑拈八方珠玉集止及其半每至曹洞夾嶺石霜王宗機緣留付佛果今佛鑑佛果拈八方珠玉集具在愈可疑焉三大老後果有天童覺和尙拈頌洞下宗風爲古今絕唱迨今百年尙無評唱者予參承餘暇固請萬松老師評唱之欲成三宗鼎峙之勢忍拈覆餗貞吝之譏今評唱頌古從容菴錄已大播諸方評唱拈古請益後錄時老師年已六十有五矣循常首帶佛事人情晷隙之間侍僧請益旋舉旋錄皆不思而對應筆成文凡二十七日百則詳備神鋒穎利於斯可見矣若夫據令於臨濟棒喝以前發機於雲門三句之外豈更與佛果圓通殘餽爭長哉俊快衲子舉一明三瞥見全鼎則滂仰法眼雙鉉亦宛然矣但恐信不及徒勞話歲寒也吁壬辰重陽日湛然居士漆水移刺楚材晉卿敘於天山

燕京崇壽禪院故圓通大師朗公碑銘

師諱祖朗姓李氏薊州漁陽人九歲出家禮燕京大聖安寺圓通國師爲師大定十三年京西弘業寺受具至二十一年改弘業爲大萬安禪寺有司承制師充知事

厥後拂衣駐錫聖安復爲舉充監寺崇壽禪院者實圓通國師退老之舊居也以師爲宿舊之最承安間堅請師爲宗主任持一歷十稔又奉勅選香林禪寺開山提點凡三載勅賜總持大德荅其勤也旣而崇壽復請住持載閱五春貞祐間奉勅改賜今號度門徒凡十有一人咸有肖父之風焉師前後輔翼叢林不憚艱苦讓功責己潛德密行不可概舉師以壬午之仲冬十有四日示寂於崇壽僧臘五十三俗壽七十四師將順世預召其屬徒笑謂曰生緣我將盡矣屬徒退而相謂曰師神色自若若無他疾安得遽有是事耶后七日師命侍僧執筆代書頌云咄遮皮袋常爲患害繼祖無能念佛有賴來亦無來去亦無礙四大各離一時敗壞且道還有不敗壞者麼良久云浮雲散盡月昇空極樂光中常自在語竟乃閉目跏趺而寂於是遐邇緇素弔祭如雲嘉聲遠震愈光於生前矣其弟子輩瘞靈骨於師翁靈塔之左去京城之南可二里許丁亥之冬予奉詔搜索經籍馳傳來京有菴主志奧者師之受戒弟子也晚得法於聖安澄公圓照大禪師以僕素予朗師善屬予求碑銘僕素愛師之純古灑落與之遊者久矣師嘗云予晚節愈堅於持誦日念彌陀聖號數萬聲方止譬如抱河

梁而洛又何害焉今聞師之寂也七日預知時至雅符龍猛祖師之證無乃持誦之驗與噫聖人豈欺我哉豈欺我哉萬松老人爲宗門之大匠四海之所式範素慎許可嘗贊師之真曰德譽燔沈靈骨鏗金訥於言而敏於行璞其貌而玉其心敕選提封於國寺天資寶鍊於禪林子徒知寒蟬將蛻尙餘吟吾以爲陞圓通之堂者稽古依然接武於方今云萬松見許如是人可知已僕聞師侍從圓通國師最久而又臨終之際超然自在疑必得法於國師或因緣未合或授國師密訓不令出世亦石霜素侍者之儔侶與崇壽禪院法堂叢林制度一如聖安師久據而不請禪伯住持者亦猶素侍者平欺老黃龍下視兜率悅之意與予恐後世人責備於賢者累師之重德故雪之於此後之子孫當幹父之蠱無蹈前轍以玷師之高名焉湛然居士再拜而作銘曰

偉哉朗公

誕跡漁陽

師侍圓通

達奧穿堂

肅依宸命

屢提國寺

退己讓人

舉廢修墜

兒孫衆多

酷奉彌陀

心期極樂

迹厭娑婆

撒手便行

預知時至

臘五十三

壽七十四

奔喪赴祭

緇素駢闐

嘉聲遐播 愈盛生前 京南之原

茶毗靈骨 素荅陵空 朗師不歿

佯癡放憨 素公同參 蔑視兜率

平欺匾南 不邀宗匠 冷閑方丈

垂手無人 老殘龍象 予聞君子

責備乃賢 毋以微瑕 累乎大全

云子云孫 幹父之蠱 載震師名

永揚萬古 庚寅年六月望日

貧樂菴記

三休道人稅居於燕京之市榜其菴曰貧樂有湛然居士訪而問之曰先生之樂可得聞與曰布衣糲食任天之真或鼓琴以自娛或觀書以自適詠聖人之道歸夫子之門於是息交遊絕賓客萬慮泯絕無毫髮點翳於胸中其得失之倚伏興亡之反覆初不知也吾之樂良以此耳曰先生亦有憂乎曰樂天知命吾復何憂居士進曰子聞之君子之處貧賤富貴也憂樂相半未嘗獨憂樂也夫君子之學道也非爲己也吾君堯舜之君吾民堯舜之民此其志也使一夫一婦不被堯舜之澤者君子恥之是故君子之得志也位足以行道財足以博施不亦樂乎持盈守謙慎終如始若朽索之馭六馬不

亦憂乎其貧賤也卷而懷之獨潔一己無多財之禍絕
 高位之危此其樂也嗟流俗之未化悲聖道之將頽舉
 世寥寥無知我者此其憂也先生之樂知所謂矣先生
 之憂不其然乎道人瞪目而不答居士笑曰我知之矣
 夫子以為處富貴也嘗隱諸樂而形諸憂處貧賤也必
 隱於憂而形諸樂何哉第恐不知我者以為洋洋於富
 貴而戚戚於貧賤也道人曰他人有心予忖度之吾子
 之謂矣請以吾子之言自以為記丙子日南至湛然居
 士漆水移刺楚材晉卿題

自贊

別來十年五歲依舊一模一樣鬚髯垂到腰間眉毛儼
 然眼上龜毛錐子畫虛空寫破湛然閑伎倆

其二

有髮禪僧案涪翁自贊云似僧有髮似俗無塵無名居士人道甚似吾道
 便是塵塵劫劫露全身紙上毫端何處避

燕京大覺禪寺創建經藏記

遼重熙清寧閒築義井精舍於開陽門之郭傍有古井
 清涼甘滑因以名焉金朝天德三年展築京城仍開陽
 之名焉其里大定中寺僧善祖有因緣力道俗歸嚮者
 眾朝廷嘉之賜額大覺貞祐初天兵南伐京城既降兵

火之餘僧童絕迹官吏不爲之恤寺舍悉爲民居有之
戊子之春宣差劉公從立與其僚位高從遇輩疏請與
公和尚爲國焚修因革律爲禪奧公罄常住之所有贖
換寮舍悉隸本寺稍成叢席可容千指瑞像殿之前無
垢淨光佛舍利塔在焉殘缺幾仆提控李德者素黨於
糠蟹不信佛教至是改轍施則完葺其塔繼有提控晉
元者施蔬圃一區於寺之南以給眾用糊口粗給庚寅
之冬劉公以狀聞朝廷招提院所貯餘經一藏乞遷於
本寺安置許之於是奧公轉化檀越創建壁藏斗帳龍
龕一週凡二十架飾之以金績之以彩窮工極巧煥然
一新計所費之直白金百笏能事告成累書請湛然居
士爲記余慨然曰昔者聖人之藏書也貯之於金匱寫
之於琬琰重道尊書以示於將來也浮屠之建寶藏者
亦猶是乎吾夫子刪詩定書明禮讚易六經之下流爲
諸子春秋以降散爲史書較其卷軸不爲不多矣兵革
以來率散落於塵埃中吾儒得志於時者曾無一人爲
之哀集置之淨室安之寶架豈止今日也哉承平之世
間有儒冠率集士民修葺宣聖之廟貌者曾未卒工已
爲有司糾劾矣且以擅興之罪罪之噫吾道衰而不振
者良以此夫昔雪巖示寂於王山時萬松老人方應詔

住持仰嶠訃問既至不俟駕而行遇完顏子玉諸塗子
玉歎曰士人聞受業師之物故也雖相去信宿之地未
聞躬與其祭者豈有千里奔喪者耶佛祖之教源遠流
長者有自來矣子玉每以此事語及士大夫今奧公禪
師非爲子孫計無取功名心汲汲皇皇丐乞於道路惟
以佛宮秘藏爲務可謂不忘本矣余已致書於諸道士
大夫之居官守者各使營葺宣父之故宮亦由奧公激
之也癸巳中秋日記

湛然居士文集卷八終

湛然居士文集卷九目次

和敏之詩七十韻三首

次韻黃華和同年九日詩十首

寄雲中東堂和尚

謝萬壽潤公和尚惠書

燕京大覺禪寺奧公乞經藏記旣成以詩戲之

寄龍溪老人乞西巖香

謝聖安澄公饋藥

和王正夫韻

和孟雲卿韻

次雲卿見贈

和王正夫憶琴

繼宋德懋韻三首

和平陽張彥升見寄

跋白樂天慵屏圖

和請住東堂疏韻

寄倪公首座

和呂飛卿

戲陳秀玉

并序

湛然居士文集卷九目次終

湛然居士文集卷九

元 耶律楚材 晉卿 撰

和張敏之詩七十韻三首

敏之學士遠寄新詩七十韻捧讀之餘續貂以

尾聊資一笑

壯年多轆軻晚節歎行藏故國顏綱穢新朝明德香
材能預算大略固難量迭出神兵速無敵我武揚本圖
服叛逆何止翦講張西討窮于闐東征過樂浪彗侵天
壘壁光動太白鉞整整車徒盛鱗鱗旗鼓望天皇深責
重賢帥廟謨臧江左將擒楚河陽已滅商英雄皆入彀

強禦敢跳梁。採訪軒車鬧。司農官吏忙。輕徭常力足。薄賦不財傷。勳業超秦漢。規模邁帝王。流言無管蔡。奇計有平良。增葺新文物。耕耘古戰場。蛟龍方奮迅。鷓鴣得翱翔。偶遇風雲會。爭依日月光。永疇千古恥。一怒四夷攘。虎帳十年夢。龍庭幾度霜。迎降初請命。出郭遠相將。久敵真宜死。寬恩何敢當。赦書民有幸。歌詠壽無疆。扶杖聽黃詔。稱觴進白狼。散財竭庫藏。拔將出戎行。殷絕仁猶在。周傾道不亡。來招燕郡內。入覲大食傍。戎服貂裘紫。星軺駁馬蒼。中春辭北望。初夏過西涼。瀚海涵而湧。陰山彷彿且。徨閑雲迷去路。疎雨潤行裝。出處空興歎。風光自斷腸。典型陳故事。利病上封章。天下援深溺。中州冀小康。風俗乘喪亂。籌策要優長。痼疾如神附。遊魂笑鬼傷。仁術能骨肉。靈藥起膏肓。避禍宜緘口。當言肯括囊。遭讒心欲剖。涉苦膽先嘗。北漠絕窮域。西隅抵大洋。詩書猶不廢。終信未能忘。羶補連腮帳。繩穿朽腳牀。郊行長野興。人靜若禪房。回鶻交游熟。崑崙事蹟詳。風煙多黯黯。雲水兩茫茫。災變垂乾象。妖氛翳太陽。髯龍三島去。玉葉一枝芳。明主初登極。愚臣敢進狂。九疇從帝錫。五事合天常。大樂陳金石。朝服具冕裳。降升分上下。進退有低昂。拓境時方急。郊天且未遑。應兵無血刃。

降虜自壺漿。按堵無更肆。因敵不餽糧。宸心尊德義。聖
政濟柔剛。恩澤涵諸夏。威稜震八荒。勢連西域重。天助
北方強。舉我陪三省。求賢守四方。錦衣捐毳褐。肉食棄
糟糠。隱逸求新仕。流亡集故鄉。百官欣戴舜。萬國願歸
唐。耕釣咸生遂。工商樂未央。會將封泰岳。行看建明堂。
自歎才雕篆。長慚學面牆。君恩予久負。賢路我深妨。覆
餗恆憂懼。持盈實恐惶。故山松徑碧。舊隱菊花黃。太守
方遺舄。初平政牧羊。厚顏居此位。若已納於隍。吟嘯須
歸去。香山老侍郎。

再用張敏之韻

我愛張公子。丁年密退藏。施爲宜法則。議論自馨香。元
氣卻不死。深陂豈可量。兒時供府薦。壯歲已名揚。汲汲
尊尼父。堂堂類子張。遷居擇鄰里。濯足揀滄浪。作傳編
毛穎。談玄說劍鎗。奇才千古重。令聞萬民望。氣壓四明
客。調窮三耳臧。典謨師我舜。雅頌起予商。緜叢曾陳漢。
仁術屢說梁。本非中酒困。長爲和詩忙。道長拈連拔。時
衰心獨傷。篆文迺似李。隸字楷如王。青眼予能作。白眉
君最良。萬言陳國利。一戰捷文場。出海游龍舞。騰空翥
鳳翔。十全君子行。一代士林光。句法吾師範。詩材我竊
攘。忠心常向日。直節欲凌霜。文沒歲去久。道亡天未將。

狂瀾時既倒。木鐸子宜當。德業能純粹。學術靡疆衝。
天憎燕雀當路惡。豺狼綺語吟千韻。宸筆掃千行。行藏
關治亂。出處卜興亡。郡隸清河上。家居杜曲傍。登科年
甫冠。修史髮初蒼。仙觀嘗新欠。宮園醉晚涼。朝天恭謁
踏。退食獨彷徨。得暇多休沐。游山小治裝。一卮持竹葉。
左手把無腸。官酒澆三斗。宮詞唾百章。阮聲師校尉。琴
訣受嵇康。似玉風神異。如蘭氣味長。坦懷無戚戚。明見
笑。俛俛草檄堪醫疾。鍼詩可治盲。博聞敵武庫。高價重
珠囊。憂患經多故。艱難已備嘗。悲歌聲歷歷。雅調韻洋
洋。造次必於是。中心何日忘。生涯兩書篋。香火一禪牀。
海上尋徐福。壺中覓長房。流傳雖若此。真偽甚難詳。水
國波奔激。仙鄉路渺茫。孤身朝北闕。皓首歎東陽。險韻
嚼佳句。殘英嗅冷芳。仁人今尚在。箕子本佯狂。洪範明
皇極。彝倫敘有常。百王遺禮樂。三代舊軒裳。會補南極
缺。能令北斗昂。無媒言囁嚅。矢志思迴遑。秋老空悲扇。
天涼反賣漿。卻來頻渭釣。又絕在陳糧。志道衰猶夢。依
仁老更剛。故家三徑遠。薄土一廛荒。混混常無捨。乾乾
體自強。卒躬能省己。行道不踰方。寧恥身衣褐。誰嗟日
食糠。起歌明月夜。舒嘯白雲鄉。綺夏終辭漢。巢由固避
唐。名極得三者。柴立杙中央。榮遇傳金馬。題名刻玉堂。

未窺君所蘊。徒見子之牆。遣欲絕形累。無貪不行妨。一
瓢渠樂逸。陋巷我憂惶。犧易韋編暗。麟經古卷黃。著述
遵輔嗣。去取笑公羊。再辨麟絕筆。重箋城復隍。焦桐人
不識。獨有蔡中郎。

讀唐詩有感。復繼張敏之韻。頗有脂粉氣息。遷就
聲韻故也。呵呵。

唐室承平久。遺賢不遁藏。羅紈柔幄膩。餅餌麥疇香。馬
牧初蕃息。民編莫校量。邊城閑虎略。衛士斂鷹揚。禁苑
晨鐘動。梨園錦障張。披香風細細。太液水浪浪。河漢明
方潤。長庚淡不銑。羽旄儀兩列。冠蓋道相望。諫士陳休

戚。廷臣論否臧。金石歌大雅。琴瑟奏清商。青鳥迷鴛瓦。
烏衣遶畫梁。供張官府備。殺饌大官忙。共享清時樂。殊

無謗議傷。含元朝百辟。花萼宴諸王。主上貞觀聖。案觀

誤作官僚魏鄭良。歲時開武講。春首闢文場。異寶浮淮

平聲水。餘糧朽鳳翔。諸羌來入衛。百濟請觀光。關塞沈烽火。

鄉閭息寇攘。三春常若雨。六月不飛霜。聖德躋朝夕。仁

心本就將。俯知人意順。仰視帝心當。曠騎輕關內。精兵

重北疆。朝廷潛巨蠹。方鎮養貪狼。粉面三千輩。金釵十

二行。持盈當忌滿。居治不知亡。相罷曲江去。權移林甫

傍。華清高岷岷。驪嶠碧蒼蒼。金屋眠春曉。溫泉浴暮涼。

掖庭花爛漫。問道路彷徨。官監金犀飾。妖姬珠玉裝。危
弦驚醉耳。哀調斷柔腸。燈燭暉鳩鵲。絲簧沸建章。奢淫
幾桀紂。純儉劣成康。擊柝宮城邃。傳籌禁漏長。謀權長
汲汲。沈醉若佺佺。未悟薪及爇。誰知病已盲。人橫碧玉
笛。腰佩絳香囊。嶺表千山遠。荔枝三日嘗。仙衣吹渺渺。
蓮舸泛洋洋。力士權誠重。楊釗寵不忘。承恩趨寶座。奏
事近牙牀。熒惑頻侵斗。秋陽弗集房。人心咸怨怒。天象
不披詳。易水聲嗚咽。燕山水鬱茫。盜賊充上郡。鼙鼓起
漁陽。殺氣凌金闕。繁霜殞玉芳。環兒剛賜死。天子懼如
狂。戰士皆思變。奸臣亦易常。空閑塵羯鼓。誰舞舊霓裳。
忠義心徒順。英雄志自昂。翠華搖曳曳。鸞馭去遑遑。禁
衛庖供豕。村民路進漿。隘兵蜀道險。糊口益州糧。靈武
兵聲振。汾陽意氣剛。復收京闕克。重治寢園荒。賊勢時
深蹙。官軍力益張。羽檄傳劔閣。龍駕返南方。御府仍無
酒。飢民尙噉糠。邛都求道士。蓬島覓仙鄉。符使將歸漢。
真妃猶憶唐。金釵分一股。鈿合劈中央。揮涕春風殿。傷
心秋月堂。梧桐籠院砌。桃李映宮牆。佳夢真難得。幽懽
頗有妨。春宵成怨憶。秋夜愈悲惶。尙記脩眉綠。猶思半
額黃。強舒鸞被翠。閑殺輦車羊。陵谷俄驚海。滄浪已變
隍。臨風一卮酒。聊復酌三郎。

次韻黃華和同年九日詩十首

黃華和同年九日詩以採菊東籬下悠然見南山爲韻予愛而繼之前敘思歸之心後述參玄之志所謂倒食甘蔗者也

秋香真可人不爲無人改自慚寒昔盟東籬子空待我獨搖酒卮不得寒英採臨風望故園參商二十載

其二

西風殘日秋有客嗟幽獨偶爾得香醪姿然憶霜菊世態屢變遷生人多返復十年一夢中猶未黃粱熟

其三

無花復無蝶不似今秋窮黃花歲歲別九日年年同我居北海南子在西山東公余會何日一醉閑愁空

其四

當年別吾山曾與黃華期富貴非予志卜築臨東籬今也違初心知我者其誰挂冠猶未遂寄此相思詩

其五

無意戀三公有心辭駟馬洛陽失金谷閭山有別野芳酒瀉盈樽秋香折盈把沈醉臥西風不讓梨花下

其六

汨沒紅塵中辜負黃華秋林泉與朝市試問孰爲優胡

然久沈者令我心悠悠。酷思山水樂。夢寐空神遊。

其七

歲月不我與。彈指及衰年。平生諳萬事。抵死參重玄。因緣不可滯。慎無法自然。兩邊都不立。別有壺中天。

其八

無知豈真知。無見非真見。遮照玄縱橫。機關千萬變。虎口幾橫身。臨敵經百戰。三折爲良醫。一交學一便。

其九

五流分洞下。一派起湖南。春水無心碧。秋山著意嵐。臨濟真顛漢。曹山放酒酣。許多閑伎倆。仔細好生參。

其十

水外猶逢水。山前更有山。元知非內外。更不在中間。測海纔盈掬。窺天見一斑。樞機謾竭世。一筆請君刪。

寄雲中東堂和尚

雲中種出火蓮華。到底東堂是作家。伏手骨拋腰下劍。笑人家具手中蛇。三玄戈甲徒心亂。五位君臣莫眼花。只遮些子難理會。草鞋包裹破袈裟。

謝萬壽潤公和尚惠書

多謝堂頭遠賜書。驚人才筆我難如。承當禪髓心無媿。供奉佛牙力有餘。幼子可襲先父業。游人卻到舊時居。

箇中消息誰能悉。玉女乘風跨鐵驢。

燕京大覺禪寺奧公乞經藏記成既以詩戲之

詞源老去苦無多。強著閑文讚釋迦。適健兔毫生月窟。
光明蠶紙出新羅。茶爐幾辨龍涎燼。玉板十分鳳墨磨。
此起科差真可笑。湛然陪酒更陪歌。

新獲紫玉板
視於友人

寄龍溪老人乞西巖香

寄語龍溪老古錐。西巖風韻我長思。香錢緩發鳴琴後。
瓦鼎濃薰入定時。比擬梅魂祇獨步。品量龍腦可同馳。
湛然鼻孔撩天大。穿過多時不自知。

謝聖安澄公饋藥

一粒靈丹寄我嘗。湛然回簡謝西堂。殺活一草真難會。
藥病相治未易量。仔細嚼時元不礙。渾淪吞下也無妨。
聖安骨董知多少。賣弄千年舊藥方。

和王正夫韻

壯年自笑鬢先霜。喜色眉間一點黃。退食紫宸居鳳閣。
朝天丹闕列鴛行。功名必要光前古。富貴何須歸故鄉。
濟世元知有仁政。活人不假返魂香。

繼孟雲卿韻

歸與奚待鬢雙皤。無恙閭山聳岌峩。萬壑松風思仰嶠。
千巖煙雨憶平坡。

仰山平坡皆燕然名刹也。案仰山寺當在柳山嶺平坡寺在翠微山。

開基氣概鯨吞海。遁世生涯鼠飲河。好買扁舟從此逝。
醉眠江國一漁蓑。

次雲卿見贈

濟濟千官侍玉宸。尊賢容眾更親親。風雲際會千年少。
天地恩私四海均。西狩一蘇張掖亂。南巡重變大梁春。
車書南北無多日。萬里河山宇宙新。

一作會
同文軌

和王正夫憶琴

道人塵世厭囂塵。白雪陽春雅意深。萬頃松風皆有趣。
一溪流水本無心。忘機觸處成佳譜。信手拈來總妙音。
陶老無絃猶是剩。何如居士更無琴。

繼宋德懋韻三首

聖人開運憶斯年。睿智文明稟自天。旁午衣冠遊北海。
縱橫耕釣滿居延。月氏入貢稱屬國。日本觀光列戶編。
威震西溟千萬里。漢唐鴻業亦虛傳。

其二

笑我區區亦強爲。故園荒矣欲何之。讀書測海持螺測。
學道窺天以管窺。疲俗不許新疾苦。滯官難撫舊瘡痍。
才微任重宜求退。自有當途國手醫。

其三

廣平流落寓平城。親老家貧強苟生。炎漢蕭曹賢政事。

李唐房杜美聲名。進求高譽千金重。退隱閑身一葉輕。
應繼開元舊勳業。華堂鐘鼓對長檠。

和平陽張彥升見寄

天兵出雲中。一戰平城破。居庸守將亡。京畿遊騎邏。有
客赴澶淵。子常倅開州無人送臨賀。奸臣興弒逆。時君遠遷
播。聖主得中原。明詔求王佐。胡然北海遊。不得南陽臥。
寵遇命前席。客星侵帝座。萬里金山行。三經玉門過。于
闐歲貢脩。燉煌兵勢挫。國維張禮義。民生重食貨。黜陟
九等分。幽明三載課。小人絕覬覦。賢才無輒軻。功名本
忌盈。廟堂難久坐。老矣盍歸來。歸與可重和。俯仰不心
慙。寬弘從面唾。清濁自沙汰。精粗任揚簸。賦性嗜蔬閒。
高眠樂慵惰。蒼雞粗庖充。黃犢足犁拖。幼子事耕鋤。老
妻供碓磨。隨分養餘齡。雖飢而不餓。

跋白樂天慵屏圖

三盃兀兀元如道。一覺昏昏恰似真。不識香山慵睡意。
知音自有箇中人。

和請住東堂疏韻

東堂不肯臥西堂。珍御鮮食別樣裝。枉費青帘三百尺。
雲中公子不來嘗。

寄倪公首座

亨監逃海淹薈瓮隆老成龍過禹門獨有倪公尙癡坐
幾時承繼萬松軒

和呂飛卿

一試戎衣天定初達賢不得退閒居盟津既渡諸侯喜
親見王舟躍白魚

戲陳秀玉并序

萬壽堂頭自汴梁來遠寄萬師偈頌舊本有和
節度陳公一絕云清溪居士陳秀玉要結蓮宮
香火緣賺得梢翁搖艣棹卻云到岸不須船噫
三十年前已有此段公案湛然目清溪爲昧心

居士者厥有旨哉僕本參萬松時秀玉盛稱老
師之德業爾後少得受用皆清溪導引之力也
每欲報之秀玉竟不一染指故作是詩以戲之

不見桃源路渺茫騎驢覓驢清溪招引到仙鄉未當好湛然幸
得齧齧飽也須吐卻擘與些兒不肯嘗恰似真个

湛然居士文集卷九終

湛然居士文集卷十目次

扈從冬狩

用秀玉韻

送西方子尙

用樗軒韻謝秀玉見惠東坡杖

謝邦瑞韻送行

謝西方器之贈阮杖

繼希安古韻

和非熊韻二首

過深州慈民院

用李君實韻

繼崔子文韻

繼武善夫韻

鼓琴

扈從羽獵

狼山宥獵

對雪鼓琴

寄冰室散人

寄平陽潤和尚

紅梅二首

吟醉軒

寄西庵上人用舊韻四首

和漁陽趙光祖二詩

自贊

再過太原題覃公秀野園

和韓浩然韻二首

張漢臣因入覲索詩

和謝昭先韻

德恆將行以詩見贈因用元韻以見意

送文叔南行

和馮揚善九日韻

示石州劉企賢

和劉子中韻

李庭訓和子詩見寄復用元韻以謝之

和黃山張敏之擬黃庭詞韻

寄嵩公堂頭同參

寄移刺子春

寄妹夫人

送姪九齡行

送姪子真行

和英粹中山堂韻

和武善夫韻

和馮揚善韻

和董彥才東坡鐵杖詩二十韻

湛然居士文集卷十目次終

湛然居士文集卷十

元 耶律楚材 晉卿 撰

扈從冬狩

癸巳扈從冬狩。獨予誦書於穹廬中。因自譏云。
 天皇冬狩如行兵。白旄一麾長圍成。長圍不知幾千里。
 蟄龍震慄山神驚。長圍布置如圓陣。萬里雲屯貫魚進。
 千羣野馬雜山羊。赤熊白鹿奔青麇。壯士彎弓殞奇獸。
 更驅虎豹逐貪狼。御閑有馴豹縱之以搏野獸獨有中書倦遊客。放
 下氊簾誦周易。

用秀玉韻

甲午之秋秀玉殿學遠以新詩寄東坡杖因用原韻謝之

七尺烏虬乳節堅。清谿寄我我欣然。敢輕墨鐵三千兩。遠勝黃金百萬錢。好句君堪坡老敵。清詩予負定公先。他年攜此林泉去。靜倚松軒誦大全。

送西方子尙

西方子尙氣凌雲。一見忘年各任眞。陰德傳家宜有慶。義方垂訓不違仁。雄文固可魁天下。確論曾無詭聖人。天降英才須有意。好將吾道濟斯民。

用樗軒散人韻謝秀玉先生見惠東坡杖

圓方頂足法高卑。五九蒼蒼老節奇。一日湛然獲二寶。東坡鐵杖寂通詩。

和邦瑞韻送行

幸有和林酒一樽。尙醞出於和林城故有是句地爐煨火爲君溫。昔年相見興三歎。此日臨行贈一言。士行莫忘直報怨。人情須信害生恩。而今躍入驚人浪。珍重風濤過禹門。

謝西方器之贈阮杖并序

了然居士素蓄東坡鐵杖。泪地字號阮。眞絕世之寶也。天兵旣克汴梁。先生攜二君來燕。欲藏之。恐不能終寶。欲贈湛然。南北相去。不知其幾。

千里慮中道浮沈。是以獻諸秀王殿學田公奉御。欲轉致於予也。甲午之秋，陳田入覲，果饋之於我。亂道數語，用酬厚意。

睢陽三絕從來傳。坡仙鐵杖為之先。宋朝四美豈易得。地君神器稱乎賢。了然居士隱洛瀍。讀書好古有積年。擒龍捉日獲二寶。寶之鑿棟屋壁穿。龍庭萬里疊山川。欲來饋我嗟無緣。將奪固與此理玄。慙慙攜贈陳與田。陳田今歲來朝天。惠然出賜穹廬前。烏虬入手蒼壁懸。恍然遺世如登仙。長蛟倚壁光娟娟。鱗介欲生如蜿蜒。澄澄秋月瑩朝鏡。須臾洗盡予腥羶。足方法地頂法乾。四十五節松柏堅。七尺烏金三十兩。微篁瑟瑟鳴哀蟬。雲頂纖纖空腹圓。十三玉柱鴻翩翩。航航雲坐踞猛虎。巖巖山口雙雙絃。鐵君伴我遊林泉。足疾頓減衝雲煙。臨風三弄碎瓊玉。清商秋水聲涓涓。安仁得此如臨淵。子聃求杖不惜錢。湛然坐受匪勞力。不勝其服心胡然。西方諷我求終焉。故令二友相招延。抱桐扶杖闔山巔。舉觴笑詠秋風邊。了然居士作鐵君傳云長七尺重三節世傳嵇生造又云昔顯宗東宮時常讀東坡鐵杖詩因召侍臣鄭子聃問杖之存亡子聃以在睢陽為對因以數千緡購於張文定公之孫其孫藏於屋棟子聃竟不得一見云地字號阮亡宋之故物天地玄黃此四阮為絕寶也泰和間祕於禁中待詔孫安仁之姊以阮得入侍上以此阮賜之安仁屢求之其姊以阮見寄舊

制宮掖中侍人不許與親戚通耗安仁冒法
得之其好事有如此者故子引用其語云

繼希安古詩韻

垂盡絲綸不上鉤。冥鴻高舉弋無由。不圖垂譽流千古。
安肯低眉謁五侯。

和非熊韻

蠻觸功名未足誇。掀然一笑付南華。他年擊破疑團後。
始覺從來盡眼花。

和非熊韻

藹藹英聲鎮北州。非熊人物本風流。時逢佳客開青眼。
久領元戎尙黑頭。已發豐城神劍出。休嗟暗室夜光投。

驅兵經略關中了。題遍長安舊酒樓。

過深州慈氏院

今年扈從次饒溝。暫解征鞍慈氏遊。世變劫灰何所有。
人隨兵火鮮能留。堂堂聖像孰曾識。熒熒眞詮詎可求。
醉墨淋漓灑塵壁。使人知我過深州。

用李若實韻

多病逢秋苦未宜。天涯屈指故人稀。塵飛滄海悲人世。
夢斷黃梁笑錦衣。靜樂浮榮難兩得。宦情歸興本相違。
高山流水無窮思。撫弄絲桐爲發揮。

繼崔子文韻

崔子龍鐘亦可憐。臨風相送我胡然。君來玉塞三千里。
余隱龍沙二十年。美玉詎容藏韞櫝。精金到底入鈞甄。
他時定下搜賢詔。先到河東汾水邊。

繼武善夫韻

老子年來酷愛閑。不堪白髮映蒼顏。十年興廢悲歌裏。
半世干戈寤寐閒。北闕欲辭新鳳閣。東州元有舊閭山。
熊經鳥引聊終老。崑下疎松正好攀。

鼓琴

宴息穹廬中。飽食無用心。讀書費目力。苦思嫌哦吟。樗
博近博徒。圍棋殺機深。洞簫耗余氣。纂筑惡鄭音。呼童
炷梅魂。索我春雷琴。何止銷我憂。還能禁邪淫。正席設
棊几。危坐獨整襟。尋徽促玉軫。調絃思沈沈。清聲鳴鶴
鸞。古意鏘石金。秋水洗塵耳。秋風振高林。清興騰八表。
成連何必尋。絃指忽兩忘。世事如商參。泥塗視富貴。晝
夜等古今。湛然有幽居。祇在閩山陰。茅亭遶流泉。松竹
幽森森。攜琴當老此。歸去投吾簪。

扈從羽獵

湛然扈從狼山東。御閑天馬如遊龍。驚狐突出過飛鳥。
霜蹄霹靂飛塵中。馬上將軍弓挽月。脩尾蒙茸臥殘雪。
玉翎猶帶血模糊。駮駮嘶鳴汗微血。長圍四合匝數重。

東西馳射奔追風。鳴鞘一震翠華去。滿川枕藉皆豺熊。
自笑中書老居士。擁鼻微吟弓矢廢。向人忍恥乞其餘。
瘦兔癯獐紫駝背。吾儒六藝聞吾書。男兒可廢射御乎。
明年准備秋山底。試一如皋學射雉。

狼山宥獵

扈從車駕出獵狼山。圍既合。奉詔悉宥之。因作是詩。

君不見武皇校獵長楊裏。子雲作賦誇奢靡。又不見開
元講武驪山傍。廬陵脩史譏禽荒。二君所爲不足法。徒
令千載人雌黃。吾皇巡狩行周禮。長圍一合三千里。白
羽飛空金鑊鳴。狡兔雄狐應弦死。翠華駐蹕傳絲綸。四
開湯網無掩羣。天子恩波沐禽獸。狼山草木咸忻忻。

對雪鼓琴

君不見黨侯賞雪斟羊羔。蛾眉低唱白雲謠。慷慨樽前
一絕倒。高談闊論誇雄豪。又不見陶穀開軒收竹雪。旋
燒活火烹團月。笑撚吟鬚吟雪詩。冷淡生活太清絕。清
歡濁樂爭相高。至人視此輕鴻毛。嗜音酣酒元麤俗。癖
茶嚼句空劬勞。龍庭飛雪風淒冽。天地模糊同一色。數
卮美漣溫如春。三弄悲風絃欲折。酪奴歡伯持降旌。詩
聲歌韻不敢鳴。黨武陶文都勘破。真識此心無一箇。

寄冰室散人

佳人元不是摩登。幻術因循汗此生。對雪鮮吟飛絮句。滅燈能審斷絃聲。鳳樓瀟灑閑瓊館。冰室深沈冷玉笙。好訪龍溪善知識。傳燈何啻忽持名。

三學尼長老道號龍溪老人

寄平陽潤和尚

張彥升寄平陽潤和尚所著金盞兒十首因作詩寄潤公

十首新詞寄我時。淨名手段我獨知。解將沒孔鍊鎚子。打就無聲金盞兒。言外翻騰閑曲調。劫前拈弄古鈴鎚。清和露布殺公案。賺得衰翁一首詩。

紅梅

東坡謂認桃無綠葉辨杏有青枝太麤俗因潤飾其語成之

瘦損佳人冰雪枝。天教妝抹入時宜。小桃嫌鋪翠雲葉。疎杏驚看碧玉枝。李白詩成怒妃子。吳宮宴罷醉西施。而今辜負黃昏月。只少西湖處士詩。

其二

天仙皎皎素羅裳。淡抹濃塗總不妨。酒暈半潮妃子醉。胭脂初試壽陽妝。肯同桃杏迷蜂蝶。本與松筠傲雪霜。顧影也應悲漢室。臨風猶似怨三郎。

吟醉軒

脩竹千竿五畝宮。幽居活計興無窮。清詞麗句梅詩老。白髮蒼顏歐醉翁。灑墨疾書千首敏。浮白痛飲百樽空。醉吟聞有香山老。倒用顛拈意暗同。

寄西菴上人用舊韻四首

別後無緣得再參。新詩重寄代和南。他年放我休官去。只向雲川結小庵。

功名我已讓曹參。又見曹參定五南。布鞵青鞋從此始。濟源有問侍中庵。

多幸松軒得罷參。玉泉山水勝江南。泉邊便作歸休計。何必香山覓舊庵。

憶昔吾師萬松老也放晚參。揚兵西北擊東南。一聲霹靂龍飛去。尚有癡人宿草庵。

和漁陽趙光祖二詩

巖廊深責忝疑丞。位重材輕負寵榮。猾虜七擒輸葛亮。奇謀六出媿陳平。未行禮樂常如歉。欲挂衣冠似不情。何日對君言我志。夜闌秉燭笑談傾。

其二

生民垂欲陟春臺。南北妖氛絕點埃。典禮已隨前代廢。遺音猶怨後庭哀。十年歎我垂垂老。萬里憐君得得來。此語縱無多忌諱。緘題未可對人開。

自贊

美髯中書白衣居士。從他抹粉施朱。一任安名立字。手中玉麈震雷音。說盡人間無限事。

再過太原題覃公秀野園

君實洛陽園。花竹秀而野。先生取此意。開園臨古社。土階登以石。茅亭略其瓦。佳木碧雲搖。清泉寒玉瀉。開軒扣琴筑。撫景飛觴斝。我來正秋晚。殘英折盈把。粲然啟一笑。琅然歌二雅。將歸且裴徊。幽尋未能捨。呼酒盡餘興。索筆為模寫。緬懷溫國公。重名滿天下。寥寥二百年。童卒傳司馬。君侯築茲圃。如有所慕者。晞顏顏之徒。子亦斯人也。

和韓浩然韻二首

浩然以昇元寶器玉潤鳴泉二琴見贈勉和來

詩用酬厚意

標格雄雄蘊藉深。烏龍胸臆隱雷音。一雙神器波及我。不負分金結義心。浩然得四琴分二琴於我故有是句

又

一曲風高奏古宮。坐賸神物媿無功。千金厚惠將何報。鶚表慇懃效孔融。

張漢臣因入覲索詩

漢臣千里覲龍庭。欲使天皇致太平。十事便宜言懇切。三千貔虎令嚴明。好籌廟算如留相。莫憶鱸魚似季鷹。一統要荒君勉力。雲臺須占最高名。

和謝昭先韻

失笑爲劣得奚優。遇流而行坎則留。笑視紛紛兒女輩。
成是敗非徒相尤。棄人所取取所棄。獨識萬松爲出類。
本欲心空及第歸。暮請晨參惟一志。浮生迅速奔隙駒。
無窮塵劫元斯須。參透威音劫前事。花開枯木誰云枯。
河朔干戈猶未息。西域十年空旅食。賢人退隱予未能。
釣衡曠位虛名極。真人應運康世屯。數頒寬詔垂絲綸。
沛若恩波淪骨髓。皇皇四海咸蒙春。漢唐疆宇非爲大。
戍守西臨玉關界。百濟稱藩過海門。鄙語粗言其大概。
天皇自將辦多多。天兵百萬涉長河。京索爲空汴梁下。
秦皇漢武疇能過。凜凜威聲震天宇。不殺爲功果神武。
湖南一混車書同。皇業巍巍跨千古。先生吾邦之彥兮。
琴書而自怡。勁挺松柏操。磊落英雄姿。明正道無邪。
思一貫詩書。繼先覺兩全。才德真吾師。王謝來江左。家
學易道豈忘貽。須世須君展驥足。政要再鑿人耳目。小
子區區何所祝。但願天衷俞奏鶚。

德恆將行以詩見贈因用元韻以見意云

國士朝黃屋。無辭路八千。徒嗟蘇子困。誰識禰生賢。腰
下無金印。山中有翠煙。英雄須有用。勉力待中年。

送文叔南行

李子敦純不入時。而今矢志又南歸。縱無手內毛生櫟。自有囊中菜子衣。未得忠貞毘聖主。且將甘旨事慈闈。鵷雛不忘衝天志。直待三年更一飛。

和馮揚善九日韻

馮君今歲又離家。攜手賡酬海一涯。秦漢興亡真夢寐。蘇張轆軻莫吁嗟。孔融座上樽盈酒。靖節籬邊菊有華。何日公餘同此樂。西風一醉泛流霞。

示石州劉企賢

西州來索湛然詩。笑點霜毫錄鄙辭。底事行藏元有數。斯文否泰本由時。碩材未信明君棄。雅操何慙暴吏欺。此語頗涉人忌諱。等閒勿使細民知。

和劉子中韻

蓬山散人劉詡子中頗通儒幼依全真出家今
已還俗故有擇術不可不慎之句
蓬山北海遊珥筆陳良謀徒步而南來意氣凌馬周貪
吏亂法令如茨不可束子中有大志每甘跨下辱他日
得從龍其鋒誰敢觸今日君子來非爲五斗粟君子慎
擇術痛恨陪全真調心正是妾堪笑學鳥伸一日錯下
腳萬劫含酸辛平生大夢中不識菴中人一言贈吾子
宗匠宜相親

李庭訓和予詩見寄復用元韻以謝之

忝位台司歲月深。中書自笑不如岑。殷周禮樂真予事。
唐舜規模本素心。鄭五每慚難作相。胥靡終欲強爲霖。
隴西妙語虛推獎。舒卷寒窗盡日吟。

和黃山張敏之擬黃庭詞韻

黃山無媒亦無梯。蕭條白晝關荆扉。凌晨端坐漱玉池。
闌干苜蓿先生飢。惠然寄我黃庭詞。湛然一笑幾脫頤。
一鶴南翔一不飛。十年一夢今覺非。故山舊隱蒼松欹。
而今老盡虬龍枝。曾學四老餐紫芝。從譏懷寶而邦迷。
塵緣一掃無孑遺。隔穀觀月猶依稀。汪洋法海無邊涯。

螢光詎可窺晨晞。蓮花自是生汗泥。汗泥不染清涼肌。
彩雲易散碎琉璃。人閒四相天五衰。有爲無爲俱有爲。
壽窮塵劫元非遲。湛然醉搖芭蕉卮。薔薇深醮書淋漓。
白眼一望須彌低。黃山先生耽書癡。退藏不露龍麟姿。
對人不恥弊緼衣。自甘貧困元知微。籬邊黃菊香離披。
門前山色寒參差。不以下體遺葑菲。新詩遠寄盤龍螭。
胸中滿貯夷齊薇。忘機臨水狎鷗鷺。燕居申申不愆儀。
含光隱秀如文犀。乘閑綸釣垂清漪。躬耕禾黍方離離。
須信君子能自卑。予知先生之獨悲。深憂海內生民疲。
生民擾攘如茅絲。笑予素餐徒位尸。先生識鑒如元龜。

旁通發而爲聲詩。照我穹廬生光輝。窮通進退元有時。至人終不貪危機。他時天子求墳箴。欲行周禮脩周基。先生好應千年期。沙堤行人羨輕肥。鳳凰到底鳳池棲。太平釣石須君持。蒼生未濟無言歸。

寄嵩公堂頭同參

嵩公聞道住南宮。笑寫新詩託去鴻。准備金桃三百顆。因風寄與老髯公。

寄移刺子春

說與沙城劉子春。湛然垂老酷思君。同遊青塚秋將盡。共飲天山酒半醺。蠶紙題詩熟鍊字。檀盧談道細論文。

五年回首眞如夢。衰草寒煙正斷魂。

寄妹夫人

三十年前旅永安。鳳蕭樓上倚闌干。先叔故居之樓名初學書

畫同遊戲。靜閱琴棋相對閑。聚散悲歡燈影裏。興亡成

敗夢魂閒。安書風送來天際。望斷中州一髮山。

送姪九齡行

我欲歸休與願違。而方知命正宜歸。閭山自有當年月。一舸西風賦式微。

送姪了眞行

吾兄惟世祿。襲封食東平。幼子死王事。長安閨門英。孀

居二十年禮佛讀傳燈。一旦遇宗匠。了真訓其名。前歲
陽翟破道服。潛偷生。寧死不受辱。記疾燕山京。湛然憐
孤族。贖汝爲編氓。死生本如夢。寵辱真若驚。莫忘亂離
苦。長思厭世情。三學有龍溪。叩參宜盡誠。喝碎須彌山。
打破乾闥城。兩頭俱放下。枯木一枝榮。

和少林和尚英釋中山堂詩韻

我愛嵩山堂。山堂杖寂寂。暮煙自搖蕩。白雲風出入。冷
泠溪水寒。細細琴絲溼。離塵欲無事。又有閑踪跡。

和武善夫韻

不得潛身似許由。鑿閭辜負萬山秋。未竭犬馬雖爲慊。

忽憶猿鶴卻自羞。黃閣賴懸新篆印。白雲元有舊漁舟。
他時雪夜尋良友。且學當年王子猷。

和馮揚善韻

揚善從來慕晉卿。滄浪濁處不濯纓。關東易學就能與。
冀北詩聲莫與京。今日窮途雖蹇剝。他時行道自亨貞。
須知遜世元無悶。莫怨龍鍾出帝城。

和董彥才東坡鐵杖詩二十韻

女媧未補青天裂。神液飛精散爲鐵。嵇生箕踞鍛洪爐。
白汗翻漿滴清血。黑虬彷彿欲飛躍。鱗介蒼蒼生乳節。
情知中散氣凌雲。肯與凡工爭巧拙。柳君傳與東坡老。

神物終須歸俊傑。坡仙爲壽文定公。酬和新詩誇勝劣。
觀妙堂名龍尾硯。睢陽并此爲三絕。睢陽城破兵火炎。
神器不隨煙焰滅。了然居士出伊洛。登山度水相扶挈。
燕然分付我清谿。妙語雕鐫跨先哲。遠來攜贈白雪老。
天理似爲予所設。湛然忝位本無功。致主澤民媿皋契。
再遊北海復何恨。與君同步龍沙雪。大澤深山無所驚。
掃除魑魅驅兇蠱。輕篁歷歷吐微語。閑對幽人如鼓舌。
有如拈起擊須彌。須彌擊碎同丘垤。雲門遠遁德山去。
敢對髯翁開口說。一時驚倒野狐禪。奔走不來予闔闥。
他年神武掛冠去。誰知劫外乾坤別。橫擔此杖入千峯。
大方獨步無蹉跌。

湛然居士文集卷十終

湛然居士文集卷十一目次

用張道亨韻

題龐居士陰德圖

和馮揚善韻

和秀玉韻

示從智

答聶庭玉

繼柏巖大禪師韻

和張善長韻

愛棲巖彈琴聲法二絕

冬夜彈琴頗有所得作詩三十韻以遺猶子蘭
夜坐彈離騷

彈秋宵步月秋夜步月二曲

彈秋水

彈秋思用樂天韻二絕示景賢

彈廣陵散終日而成因賦詩五十韻 并序

吾山吟 并序

從萬松老師乞玉博山

寄萬壽潤公禪師用舊韻

寄聖安澄公禪師

寄甘泉禪師惠書

送房孫重奴行

從龍溪乞西巖香并方

乙未元日

付從究

旦日遺從祖

旦日示從同仍簡忘憂

元日勸忘憂進道

轉燈

錄寄新詩呈冲霄

寄東林

借琴

戲景賢

再用前韻二首

寄景賢

再用知字韻戲景賢

復用前韻戲呈龍岡兼善長詩友二首

慕樂天

彈廣陵散

戲劉潤之

用劉潤之韻

湛然居士文集卷十一 目次終

湛然居士文集卷十一

元 耶律楚材 晉卿 撰

用張道亨韻

道亨予故人也。閒關二十年。今寓居平水。以詩見寄。因和其韻以謝之。

大安之季君政乖。屯爻用事符雲雷。邊軍驕懦望風潰。燕南趙北飛兵埃。民財已竭轉輸困。元元思治如望梅。太白經天守帝座。長星勾已坼中台。玄臺密表告天道。災妖變異無不該。奸臣構禍謀不軌。魚鱗鱗首侵宸階。喋血京師萬人死。君臣自此相嫌猜。居庸失守紫荊破。

天兵掣電騰八垓。潛議遷都避凶禍。銜枚半夜宮門開。
河表偷生聊自固。京城留後除行臺。力窮食盡計安出。
元戎守節甘自裁。虬龍奮迅脫大難。微波沈滯獨黃能。
王師神武本不殺。一發鹿臺能散財。威聲遠震陝洛懼。
勢同拉朽如枯摧。髯公退縮養愚拙。白麻一旦天邊來。
萬里龍庭謁天子。輶車軋軋風塵埋。言輕無用自緘默。
浮沈鷓鷯相趨陪。布幕羶廬庇風雨。日中一食如持齋。
瀚海波聲寒汹涌。金山峯勢高崔嵬。十年行役亦艱苦。
鹽車強駕同駑駘。美湏如飴潤喉吻。仃伶獨撥寒爐灰。
故園夢斷幾千里。燕然回首白雲堆。彈鋏悲歌望明月。
山城明月空徘徊。往事如絲不敢憶。令人感慨生餘哀。
聖人繼起踐九五。歡聲騰沸天之涯。萬國梯航喜奔走。
幣帛交列陳瓊瑰。天子恩威溢中外。遠爾翕然無不懷。
四民樂業庶政舉。宗臣戮力諸王諧。行殿受朝設鐘鼓。
明堂祭祀陳大壘。卿雲輪菌自紛紛。妖星不復侵天街。
否道已窮受諸泰。人心已順天心迴。制度一新從簡略。
禁網疎闊如天恢。賢才尙隱若冥雁。區區弋人何慕哉。
自慚忝位司鈞軸。可憐多士無梯媒。願學留侯引年去。
不與赤松遊蓬萊。閩陽舊隱度殘朽。扁舟篔簹笠五湖涯。

題龐居士陰德圖

易易難難各一機。非難非易亦新奇。若將三句分優劣。
露挂燈籠暗皺眉。

和馮揚善韻

天道不可窮。此理自古然。大暴壽盜跖。至仁天顏淵。偉
材鮮遭遇。君臣難兩全。庸愚厭梁肉。廣文寒無氈。未逢
知音人。伯牙故絕絃。我愛馮公子。孔教窮高堅。憂道不
憂貧。一室如罄懸。卻笑庠序生。供薦徒備員。詩書貯便
腹。一斗吟百篇。遠蹈顏孟迹。近比蘇黃肩。寧受跨下辱。
不爲天下先。昇平已有期。上道化日躔。九州成一統。刑
賞歸朝權。汴梁三戰定。樂浪一檄傳。先生謁承明。萬里

來秦川。徒步沙磧中。往復幾一年。揲著說易傳。應詔命
席前。十年符億兆。一世盈十千。男兒志在道。何論胝與
胼。一旦得榮遇。閭巷車馬填。窮通固由命。何必興孜煎。
用之自可進。舍之便可還。自笑髯中書。有過仍不悛。三
代不同禮。勉欲相襲沿。賢人正退隱。強起居官聯。冰炭
豈其器。安可渾愚賢。可惜和氏姿。庸工浪雕鐫。不能作
大器。取次成棄捐。潛龍喻君子。或躍或在田。未遂馬周
志。好墾楊雄塵。伏臘粗酒脯。旦夕充羹膾。窮途不足泣。
弔影無自憐。人生一瞬息。日月如璣旋。學道如牧羊。後
者爲之鞭。離羣謝富貴。遁世安林泉。勿學躁進人。扼腕

長呼天。

和秀玉韻

并序

三學老人背佛說法教。僧幽牢藏謗之。清谿老
人有頌。因和之。

清谿作窺語。湛然大笑之。僅能知大用。尙未識天機。貪
隨言語轉。錯認二阿師。箇中關捩子。卓然絕百非。三學
未嘗坐。何說非與是。半藏未有言。奚論讚與毀。解語非
干舌。能知誠匪智。爲報清谿公。無事莫生事。

示從智

知人者明。自知者智。仁人一言。溥哉其利。

答聶庭玉

文章太守鎮榆關。遠寄新詩與湛然。卓爾功名君勉力。
歸與活計我加鞭。扶衰幸有東坡杖。遣興猶存玉澗泉。
布襪青鞋任真率。東垣山水不拈錢。

繼柏巖大禪師韻

行盡千程與萬程。誰能退步見巖宸。饒渠解釋庭前雪。
笑彼難除室外塵。翡翠簾前猶是汝。琉璃殿上更何人。
直須鶴出銀籠外。受用壺天不夜春。

和張善長韻

下馬如虹氣焰雄。驚人詩筆有誰同。銀鈎老字學顏體。

玉振奇辭類國風。今日白衣聊養素。他年皇屋好推忠。
經營江左須豪哲。占取雲臺第一功。

愛棲巖彈琴聲法二絕

須信希聲是大音。猱多則亂吟多淫。世人不識棲巖意。
祇愛時宜熱鬧琴。

多著吟猱熱客耳。強生取與媚俗情。純音簡易誰能識。
卻道巖棲無木聲。

冬夜彈琴頗有所得。亂道拙語三十韻。以遺猶子。

蘭并序

余幼年刻意於琴。初受指於弭大用。其閑雅平

淡。自成一派。余愛棲巖如蜀聲之峻急。快人耳目。每恨不得對指傳聲。聞關二十年。予奏之。索於汴梁得焉。中道而卒。其子蘭之琴事深得棲巖之遺意。甲午之冬。余扈從羽獵。以足疾得告。凡六十日。對彈操弄五十餘曲。棲巖妙旨於是盡得之。因作是詩以記其事云。

湛然有琴癖。不好凡絲竹。兒時已存心。壯年學愈篤。倉忙兵火際。遺譜不及錄。四首二十秋。絲桐高閣束。棲巖有後人。萬里來相逐。能繼箕裘業。待予爲季叔。今冬六十日。對彈五十曲。五旬記新聲。十朝溫已熟。高山壯意。

浩然集卷十一
五
氣秋水清。心日陽春撼。瓊玖白雪碎。瑤玉洛浦太含悲。
楚妃歎如哭。離騷泣鬼神。止息振林木。秋思盡雅興。三
樂歌清福。自餘不暇數。渴心今已沃。昔我師弭君。平淡
聲不促。如奏清廟樂。威儀自穆穆。今觀棲巖意。節奏變
神速。雖繁而不亂。欲斷還能續。吟猗從簡易。輕重分起
伏。一聞棲巖聲。不覺傾心服。彼此成一家。春蘭與秋菊。
我今會爲一。滄海涵百谷。稍疾意不急。似遲聲不跼。二
子終身學。今日皆歸僕。我本嗜疎懶。富貴如桎梏。幸遇
萬松師。一悟消三毒。早晚掛冠去。閭山結茅屋。蔬筍粗
充庖。糲飯炊脫粟。有我春雷子。豈憚食無肉。旦夕飽純
音。便是平生足。

夜坐彈離騷

一曲離騷一碗茶。箇中真味更何加。香銷燭盡穹廬冷。
星斗闌干山月斜。

彈秋宵步月秋夜步月二曲

碧玉聲中步月歌。彈來彈去不嫌多。從教人笑成琴癖。
老子佯呆不管他。

彈秋水

信意彈秋水。清商促軫成。只疑天上曲。不似世間聲。海
若誠無敵。河神已請平。三朝不彈此。心竅覺塵生。

彈秋思用樂天韻二絕示景賢

秋思而今不入時。平和節奏苦嫌遲。香山舊譜重拈出。不問知音知不知。
粼粼斷似烏蛇蚶。瑟瑟微如古殿苔。玉澗鳴泉獨受用。穹廬祇少景賢來。

彈廣陵散終日而成因賦詩五十韻并序

嵇叔夜能作廣陵散。史氏謂叔夜宿華陽亭夜。中有鬼神授之。韓臯以爲揚州者廣陵故地。魏氏之季母丘儉輩皆都督揚州。爲司馬懿父子所殺。叔夜痛憤之。懷寫之於琴。以名其曲。言魏

之忠臣散殄於廣陵也。蓋避當時之禍。乃託於鬼神耳。叔夜自云。靳固其曲。不以傳袁孝尼。唐乾符閒。待詔王遨爲季山甫鼓之。近代大定閒。汴梁留後完顏光祿者。命士人張研一彈之。因請中議大夫張崇爲譜序。崇備敘此事。渠云。驗於琴譜。有井里別姊舜卿報義。取韓相投劍之類。皆刺客聶政爲嚴仲子刺殺韓相俠累之事。特無與揚州事相近者。意其叔夜以廣陵名曲。微示其意。而終畏晉禍。其序其聲。假聶之事爲名耳。韓臯徒知託於鬼物以避難。而不知其序

其聲皆有所託也。崇之論似是而非，余以爲叔夜作此曲也。晉尙未受禪，慢商與宮同聲，臣行君道，指司馬懿父子權侔人主，以悟時君也。又序聶政之事，以譏權臣之罪，不啻俠累，安得仗義之士以誅君側之惡，有所激也。不然則遠引聶政之事，甚無謂也。泰和閒，待詔張器之亦彈此曲，每至沈思峻迹，二篇緩彈之，節奏支離，未盡其善。獨棲巖老人混而爲一，士大夫服其精妙。其子蘭亦得棲巖之遺意焉。

湛然數從軍，十稔苦行役。而今近衰老，足疾困卑溼。歲暮懶出門，不欲爲無益。穹廬何所有，祇有琴三尺。時復一絃歌，不猶賢博奕。信能禁邪念，閒愁破堆積。清且炷幽香，澄心彈止息。薄暮已得意，焚膏達中夕。古譜成巨軸，無慮聲千百。大意分四節，四十有四拍。品茲欲終調，六絃一時劃。初訝似破竹，不止如裂帛。忘身志慷慨，別姊情慘戚。衝冠氣何壯，投劍聲如擲。呼幽達穹蒼，長虹如玉立。將彈怒發篇，寒風自瑟瑟。瓊珠落玉器，雹墜漁人笠。別鶴唳蒼松，哀猿啼怪柏。數聲如怨訴，寒泉古澗澗。幾折變軒昂，奔流禹門急。大絃忽一捺，應弦如破的。雲煙速變滅，風雷恣呼吸。數作撥刺聲，指邊轟霹靂。一

鼓息萬動。再弄鬼神泣。叔夜志豪邁。聲名動蠻貊。洪爐煅神劍。自覺乾坤窄。鍾會來相過。箕踞方袒裼。一旦讚殺之。始知襟度陋。新聲東市絕。孝尼無所獲。密傳追王遨。曾爲山甫客。近代有張研。妙指莫能及。琴道震汴洛。屢陪光祿席。器之雖有聲。鍊此垂頭白。中間另起意。沈思至峻迹。節奏似支離。美玉成破壁。爲山虧一簣。未精誠可惜。我愛棲巖翁。翻聲從舊格。始終成一貫。雅趣超今昔。三引入五序。始作意如翁。縱之果純如。將終繳而繹。嵇生能作此。史臣書簡策。又謂神所授。傳自華陽驛。韓皋破是說。以爲避晉隙。張崇作譜序。似是未爲得。我今通此論。是非自懸隔。商與宮同聲。斷知臣道逆。權臣侔人主。不啻韓相賊。安得聶政徒。元惡誅君側。上欲悟天子。下則有所激。惜哉中散意。千古無人識。

吾山吟

兒鑄學鼓琴。未期月。頗能成弄。有古調絃泛聲。一篇鑄愛之。請余爲文。因補以木聲。稍隱括之。歸於羽音。起於南宮。終於大簇。亦相生之義也。以文之首句有吾山之語。因命爲吾山吟。聊塞鑄之請。不敢示諸他人也。澁然題。

吾山吾山。予將歸。予將歸。深溪蒼松圍。茅亭局柴扉。水

邊林下琴書樂矣。水邊林下琴書樂矣。不許市朝知猿鶴悲。吾山胡不歸。

從萬松老師乞玉博山

吾師珍惜玉山爐。可歎雕紋朴喪初。無黨無偏三足峙。不緇不磷一心虛。禮佛誦讀須資汝。示眾拈香正起予。對此好彈三澗雪。因風遠寄萬松書。

寄萬壽潤公禪師用舊韻

懶答禪師一紙書。禪師佳句古誰如。不才歎我垂垂老。美裕憐君綽綽餘。斷臂志能如慧祖。點胸終不似雲居。三關參到縱橫處。識破黃龍腳似驢。

寄聖安澄公禪師

澄公屢有寄書來。不著寒溫問訊予。老柏依然籠古殿。庭中有怪柏數株。旃檀無恙鎖精廬。金鱗透網三乘外。大隱居。鄜千載餘。聖安居市中。案聖安崇效兩寺。今皆近南偏門荒寂已甚。元時大城偏西。故其時寺居中。祇有些兒堪恨處。向人剛覓護身符。

寄甘泉禪師謝惠書

萬松節外有孫枝。德業文章冠一時。不惜臨風寄新句。知音消得湛然詩。

送房孫重奴行

汝亦東丹十世孫。家亡國破一身存。而今正好行仁義。

勿學輕薄辱我門。

從龍溪乞西巖香井方

余愛龍溪老人之西巖香。屢乞之。每恨得少。旋踵而盡。因道鄙語乞香井方。

我愛龍溪新樣香。西巖風韻卒難忘。深玄欲說舌頭短。妙觀先通鼻孔長。秋水彈時宜受用。碧巖讀處二相當。清香妙譜都拈出。莫惜十年舊藥方。

乙未元日

劫前別有一壺天。萬古長空無後先。建化門頭聊爾爾。也隨徒眾賀新年。

付從究

曠劫茫茫困路塵。回頭便是故園春。而今既遇松軒老。究取元來不死人。

且日遺從祖

乙未且日從祖索詩。浪道數句以遺之。

塵世春風歲又遷。僚屬來賀古川前。誰知萬法生心上。不覺雙毛落鬢邊。人生能得幾納履。文章不直一文錢。威音那畔乾坤別。且道而今是幾年。

且日示從同仍簡忘憂

乙未且日從同索詩。因道拙偈二十韻。仍簡忘

憂

昔我馳星輶。駐車歸化城。汝方來。摳衣從同訓。其名侍
予垂十年。百事無一成。律歷且及半。琴道猶未精。禪書
置一隅。尙未窮一經。大道若滄海。萬古長澄清。酌之而
不竭。注之而不盈。偃鼠得滿腹。亦足飽鯤鯨。又如大圓
鏡。歷劫長圓明。中間無影像。應物不現形。漢胡遞相照。
出沒能縱橫。又如萬鈞鐘。寂然藏雄聲。隨叩而卽應。圓
音自鏘鏗。小擊而小響。大撞而大鳴。又如長明燭。積歲
長熒熒。分爲百千萬。光明如日星。惠之而不費。是爲無
盡燈。日月照天下。不可語瞽盲。雷霆碎山岳。聾者未曾
聽。枯木元無花。卻怨春不平。作偈以勸汝。可以爲盤銘。

元日勸忘憂進道

乙未元日忘憂居士索詩。勉道數語。因勸其進
道云。

劫外風光。別人閒。日月遷南洲。添一歲。北海又三年。榮
利蝸黏壁。功名蟻慕羶。萬緣都放下。好扣祖師禪。

轉燈

乙未元日安慶以轉燈見贈。忘憂居士索詩。走
筆作偈。以警世云。

安慶作戲燈。惠然來贈我。藏燈藉微明。細火薰其座。乘

茲風火力盤旋如轉磨。中有角抵人揮臂。不知禍團團。十方匝輪迴。莫能越。此燈雖戲具。無果大因果。三世塵沙佛。皆如轉燈過。三千大千界。成壞亦風火。所以明眼人。重道輕利貨。生死比夢寐。榮華等涕吐。長行此觀心。人間都看破。多少看燈人。知音無一箇。

錄寄新詩呈冲霄

冲霄酷愛玉泉詩。媿我年來無好辭。錄寄新詩三十首。莫教俗子等閑知。

寄東林

屢承東林同參賜書。未遑裁答。亂道鄙語。以代

手訥云

同參萬里寄書來。盥手緘封手自開。沒骨舌頭我難說。無根樹子若能栽。金鵬手段平翻海。任老鉤竿不釣能。何日萬松軒側畔。笑談抵掌一開懷。

借琴

龍岡居士本知音。參透淵明得趣心。暫借桐君休吝惜。玉泉習氣未忘琴。

戲景賢

景賢愛彈雉朝飛。作是詩以戲之。

牧犢曾歎雉朝飛。七十無妻是以悲。何事龍岡愛彈此。

欲學白博覓楊枝

再用前韻

景賢彈雉朝飛。予作詩以戲之。蒙寵和有。若有餘陰乞一枝之句。予再用前韻以拒之。

遏住行雲不敢飛。一聲還噎一聲悲。蠻兒深愜龍岡意。唱得香山楊柳枝。

又

妙舞盤中塵不飛。採蓮一曲繞梁悲。慕素魯蠻獨當兩貫珠歌韻柳腰枝。

寄景賢

因廷疾在告。彈琴逾時。腕臂作痛。自訟其癡。作詩以寄景賢。

湛然有過必人知。笑寄龍岡自訟詩。閻浮眾生苦爲樂。華嚴皇覺藥能醫。十年擐甲足疾作。三月彈琴臂力衰。因病得閑閑卻病。閑中雖病也便宜。

再用知字韻戲景賢

薄德從來總畏知。龍岡又有和來詩。機關不解活龍弄。是語癖疾還如死馬醫。大舜再逢難永訣。周公不夢覺吾衰。鳳池元是夔龍宅。山鹿野麋終不宜。

復用前韻戲呈龍岡居士兼善長詩友

君有蠻兒我已知。湛然援筆上新詩。翠眉也惹禪心動。
玉頰休教獺髓醫。舊有藥爐雖竭底。新來鼎器卻扶衰。
隆隆玉準能青眼。不解雲霓也自宜。西人都服白衣。

其二

行雨行雲一夜飛。襄王從此莫含悲。蠻兒侍寢龍崗老。
恰似柔稊生柳枝。

慕樂天

荆水荆水出於玉泉渾如八節灘。玉泉佳趣類香山。韋編周易
忘深意。貝葉佛經送老閑。爽我琴書池五畝。侑人詩酒
竹千竿。樂天活計都相似。脂粉獨嫌素與蠻。

彈廣陵散

居士閑彈止息時。胸中鬱結了無遺。樂天若得嵇生意。
未肯獨吟秋思詩。

戲劉潤之

從劉潤之借杜詩。因豪奪之作是詩。以戲之。
休嗔久假不云歸。長笑還書是一癡。居士親行萬里地。
政須百註杜陵詩。

用劉潤之韻

箇中消息本忘言。一念從渠一萬年。大地遍開皆是水。
頑石不擊固無煙。成佛莫落謝公後。建業從教祖氏先。

萬法悉從心地起。元來禍福不由天。

[Faint bleed-through text from the reverse side of the page, including characters like '起', '元', '來', '禍', '福', '不', '由', '天']

湛然居士文集卷十一終

48-12053

